



ZATRAŽENO ODUZIMANJE PASOŠA KRIJUMČARIMA

Kineski državljani koji posluju u BiH i ostali krijumčarili i iznosili iz BiH velike količine gotovog novca

Dragan SLADOJEVIĆ

SARAJEVO - Nakon ispitivanja sedam Kineza, te tri bh. državljana, osumnjičenih da su iz BiH nezakonito iznijeli najmanje 15 miliona evra i time nam budžet oštetili za tri miliona KM, Tužilaštvo BiH zatražilo je određivanje mjera zabrane, uključujući i zabranu putovanja uz naredbu za privremeno oduzimanje putne isprave.

Time je prije nekoliko dana sprovedena akcija "Kurir", koju su realizovali pripadnici Državne agencije za istrage i zaštitu (SIPA) i Uprave za indirektno oporezivanje (UIO) BiH, dobila i svoj epilog.

"Prijedlogom za određivanje mjere zabrane obuhvaćeni su kineski državljani Gang Lan (52), Huang Xuefeng (47), Wu Xiaoping (42), Shaoquin Yang (48), Jiaofen Zhang (42), Ji Yongwei (44) i Zhou Zonghua (55), te bh. državljani Elvis Mumić (31), Dževad Imširević (49) i Nedžad Imširević (46), koji ima i hrvatsko državljanstvo", kažu iz Tužilaštva BiH.

To tužilaštvo od Suda BiH zatražilo je da osumnjičenima odredi i zabranu napuštanja boravišta, odnosno zabranu putovanja van područja gdje obavljaju svoju djelatnost.

"Detaljnom istragom utvrđeno je da su kineski državljani koji posluju u BiH i s njima povezana preduzeća i pravne osobe vršili krijumčarenje i iznošenje iz BiH velikih količina gotovog novca (u ukupnom iznosu od najmanje 15 miliona evra), koji nije transferiran platnim prometom i bankovnim transakcijama, već je fizički krijumčaren iz BiH na područje Hrvatske, te dalje u inostranstvo", saopšteno je juče iz Tužilaštva BiH.

Iz SIPA su, sumirajući akciju, kazali da je tokom nje izvršen pretres određenih objekata, te magacinskih prostora više osoba na 21 lokaciji na području Sarajeva, Gradačca, Brčko distrikta i Orašja.

"Prilikom pretresa pronađeni su i privremeno oduzeti, između ostalog, više od 220.000 evra, tri pištolja, razne vrste poslovnih i druge dokumentacije, više putničkih i drugih vozila, različite evidencije, mobiteli, računari... Bitno je istaći da pretresi na određenim lokacijama i dalje traju", navela je Kristina Jozić, portparol SIPA.

Istovremeno, i pripadnici UIO BiH i dalje su na terenu, te popisuju robu u firmama kod deset obveznika čiji su vlasnici kineski državljani.

"Postoje ogromni manjkovi i viškovi robe kod tih obveznika. Ono što se zaista dešavalo od avgusta prošle do septembra ove godine jeste činjenica da su ove firme uvozile robu u BiH i zatim je prodavale bez izdavanja računa", kaže Ratko Kovačević, portparol UIO BiH, a kako nezvanično saznajemo, ta roba je uglavnom na crno prodavana na pijaci "Arizona".

**PRONAĐENO I
ODUZETO VIŠE
OD 220.000 EVRA,
TE TRI PIŠTOLJA**

**Budžet oštećen za
stotine miliona**

Po riječima Ratka Kovačevića, protiv svih ovih obveznika UIO BiH će napraviti izvještaje koje će proslijediti Tužilaštvu BiH, a u ovoj godini sačinjena su 92 takva izvještaja, i sumnja se da je krivičnim djelima iz oblasti indirektnih poreza budžet BiH oštećen za 54 miliona KM.

"Od uspostave Uprave, od 2005. do ove godine, prema Tužilaštvu je ukupno proslijedeno 1.268 izvještaja gdje postoji sumnja da je budžet BiH oštećen za 252 miliona KM", kazao je Kovačević.



Nakon akcije "Kurir",
Tužilaštvo BiH za
osumnjičene predložilo
mjere zabrane

Roba na crno uglavnom
prodavana na pijaci "Arizona"
FOTO NN

IZVRŠEN
PRETRES NA
21 LOKACIJI